



Planisaziun e progettaziun deponia Ova Spin/Champsech – surdatta da lavur

Avant bundant desch ons d'eira gnü elavurà ün proget per far üna deponia da material da s-chav net sü Ova Spin. Quel proget nun es però mai gnü realisà fin hoz. Per pudair proseguir cun la planisaziun e progettaziun d'ün nouv proget dimensiunà plü pitschen, esa da surdar las lavurs ad ün büro extern specialisà. La suprastanza cumünala ha surdat quistas lavurs a la firma EcoAlpin SA, La Punt Chamues-ch.

Brail vest - Ils Muots – dumonda da princip e surdatta da lavur

Illa fracziun da Brail vegnan inseradas las parcelas da fabrica tenor princip grob. Illa part vest da Brail sun però avantman differents deficits a regard chanelisaziun ed aua meteora. Tras il proget Brail vest – Ils Muots es planisà d'adattar ed optimar las lingias cumünalas als bsögns d'hoz. Il gremi responsabel ha dat glüm verda a l'inizi dal proget e surdat las lavurs da planisaziun a la firma Caprez Ingenieure AG, Zernez. L'execuziun dal proget es planisà a partir da prümavaira 2023.

Sustegns culturals

La suprastanza cumünala ha trattà ed approvà duos dumondas da sustegn finanziaal per arrandschamaints culturals i'l Cumün da Zernez, üna jada pel «Schlager- und Volksmusik Fest Zernez 2023» e l'otra pel Cinema Staziun Lavin.

Politica d'infuormaziuns e comunicaziuns - discussiun da princip

Causa cha l'interess als tavulins da las differentas gruppas d'interess s'ha redot i'ls ultims ons, ha la suprastanza cumünala decis da desister sün l'organisaziun da quels a partir da subit. Il Cumün da Zernez organiserà d'urant l'on 2023 quatter inscunters per la populaziun cun la suprastanza cumünala illas fracziuns da Brail fin Lavin. Daplü infuormaziuns e termins seguan a temp ütil.

Inavant ha la suprastanza cumünala decis da spordscher inavant a las abitantas ed abitants la plattafuorma digitala Crossiety per diversas comunicaziuns.